

PASQVIL

ANTI PARADOXE.

Dialogue contre le
Paradoxe de la
Faculté du
vinaigre.



30196

de Lincyrac

A LYON.

1549



E petit œuvre Intitulé Antiparadoxe, Pource qu'il est escript contre le Paradoxe du vinaigre, nous auõs mis en Dialogue, tant pour euitier ennuy au lecteur: que pour inspirer vie a la parolle. Car propos entrecoupez, fâchent moins, & recréent plus le lecteur, que l'oraison continuelle, iousiours à elle mesme semblable. & plus viue est l'interlocution de deux, ou de plusieurs, que l'on re presente quasi vifz, & parlâs, que le lâgide discours d'ung seul parlant sans reclame. Et affin que l'on ne nous puisse reprocher, (ce que faiet Barptolemaus Scala, à Politian,) que nous sommes Hercules cõtrefaietz qui nous forgeõs des monstres à plaisir, si foibles que facilement les puissions desfaire. Sache le lecteur que nous n'auons rien attribué à la persone de Paradoxoleros, que luy n'ayt escript en son liure. Et qui plus est l'auõs introduict trop mieulx parlant & argumentant qu'il ne faiet, & de faiet, cõme vrainz chãpiõs, auons baille à nostre aduersaire concertateur, meilleures armes que les siennes propres, comme assez le pourra cognoistre quiconque aura leu l'ung, & l'autre. Nous protestons aussi n'auoir escript cecy par nulle malle affectiõ, sinon pour purger les Medecins Lyõnoys de suspicion de tel erreur, qui pourroit sembler estre par eulx approuuée. Et que ainsi soit n'auons escript aucune parolle iniurieuse ny touche aux vices, & mœurs, ou paraucture matière ne nous heust defailluy,

PASQVIL ANTI-

PARADOXE.

Dialogue contre le Paradoxe de la faculte du vinaigre.

INTERLOCVTES.

Pasquil, & Paradoxoleros.

PASQVIL.



CE que ie voy, tresueritable
est la sentéce de Pline au pre
mier chapitre du sentencu-
uies me liure de l'histoire na-
turelle, disant que tous ces
medecins, faictz à la haste,
qui par quelque nouueaulté veulent acquerir
bruyt, & renommée à leur nom, trocquent les
ames, & les vies des hommes.

PARADOXOLEROS.

Qui diable peut estre ce vieil Philosophastre,
auec son baston: qui si plinianement, & plaine-
mēt se courrouce des nouueaulx medecis cher-
chans d'acquerir bruyt? Il me le fault sauoir
por luy rembarrer sa tant braue audace, Car ie
m'en sens aulcunement picqué. Dieu gard Phi-
losophe, ou Morosophe, quelque tu sois,

PASQVIL.

Et toy: le ne say qui.

PARADOXOLEROS.

Tu ne scez qui? Commēt? es tu seul estrangier
en ces regiōs, & cela tu ignores? N'has tu point
ouy parler de Paradoxologos?

PASQVIL.

Mais bien de Paradoxoleros. Es tu doncq cel-
luy gētil Paradoxeur de la faculté du vinaigre?

PARADOXOLEROS.

Celluy suys ie vrayemēt. Qu'en veulx tu dire?

PASQVIL.

Rien aultre certe: sinon ce qu'en dict, & mande
le gentil coq, à lasne sot.

*Vng tas de folz, & de gloire yures
Qui font imprimer leur sotz liures
Pour acquerir bruyt d'estre ueaulx
A mettre en auant cas nouueaulx.*

Car à ce que ie voy. Tu quoque de illis es.

PARADOXOLEROS.

Er toy, desquelz es tu? Qui es tu? De quelles
gens? De quelle nation? De quel estat, & profes-
sion? Es tu Bouuier, ou Bouchier? qui si effrō-
téement mé metz au reng des veaulx?

PASQVIL.

Medecin suys ie: tel (pour le moins) que toy. Ie
suys Pasquil Medicin Romain, & des vieulx.

PARADOXOLEROS.

Ha monsieur le docteur Pasquil, vrayement Ie
ne suys esbahy si sotement, lourdement, & des-
raisonnablement tu has de moy iecté dure,
froide, & maledicque sentēce. Ains plustost

ROMANUS ROGATVS

fuys esmerueillé comme tu has peu'aulcunement parler.veu que Pasquil(lequel tu te dis estre)n'est que vne rude & informe pierre insensible:n'ayant aucun sentimēt esperit ne raison, mais vne statue,& vng Baboin rommain ridicule ne seruant à aultre chose sinon à porter, & publier impunement les diffamatoires placardz des blasonneurs.

PASQUIL.

Mon amy Paradoxoleros. Pierre suysⁱ iē voirement.mais non insensiblē,ne sans sens & sans raison,tel comme tu me describes.Car tu n'has memoire de la prophetie,qui ha dict que plustost les pierres plerōt: q̄ la verité soit taillée.Et q̄ dieu de ces pierres peut susciter les filz d'Abraā Parquoy tu ne te doibz esbahir si i'ay pouoir,& sauoir de parler.Ignores tu que vne grā de partie de la vertu naturelle est mise es pierres? Ne vois tu que les pierres(qui semblent estre trefroides geētent,& elident (mesmement quād elles sont frappées)vng feu tresuis,en elles par auant latent? duquel peut estre allumé vng grand embrasement? Je suys pierre certainement.Mais fais tu quelle pierre? Je suys pierre d'offension: contre laquelle quiconque a heurte,& empainct,il se blesse,quasse,& froisse.ainsi que tu has faict(O Paradoxoleros)empaignāt, & te aheurtant contre moy Pasquil,nō Baboin

(comme tu dis) mais simulachre de libere
& franche verité, & ce non seulement contre moy, Mais aussi contre plusieurs aultres telles fermes pierres, solides colonnes du temple AEsculapien . pour lesquelz , plus que pour moy i'ay entrepris la contrepicque de ton mal picquant vinaigre: Car contre iceulx toy rencôtrant, & frappant , has rompu, & mis par pieces ta fraile foiblesse , en te blessant grandement toy mesme, avec ton beau liure P A R A D O X E de la faculté du vinaigre.

P A R A D O X O L E R O S .

Qu'en veulx tu doncque dire, de mon Paradoxe? n'est ce pas vng œeuure merueilleux, & remply de grand fauoir?

P A S Q V I L .

C'est vinaigre mal propre à condire bonnes herbes.

P A R A D O X O L E R O S .

Pourquoy cela?

P A S Q V I L .

Pource quil n'ya ne sel ne huyle. c'est à dire ne grace, ne sapience,

P A R A D O X O L E R O S .

Ha que dis tu?

P A S Q V I L .

Ce que est vray.

P A R A D O X O L E R O S .

Vray?

PASQVIL

Trefvray.

PARADOXOLEROS.

Tu n'y saurois que reprendre.

PASQVIL

Veulx tu doncq' que i'en face l'essay?

PARADOXOLEROS.

Oy da, hardiment. Et si ie ne te?

PASQVIL

Or ayes les oreilles autant patientes à escouter
te contredire, comme tu has la langue prom-
pte à maldire.

Car qui dict ce qu'il ne deburoit

Doibt ouyr ce qu'il ne uouldroit.

PARADOXOLEROS.

Cóment tu me poings? Le cognois maintenāt
que tu en parles par affectiō, & plus par hayne,
ou enuie de mon aduancement, & craincte de
ta degradation par moy surcroissant en bruyt:
que par amour de vraye verite.

PASQVIL.

Ie proteste q' tout ce que ie contrediray à ton
ceuure, ne sera par aulcune mauuaise affection
enuers ta personne. mais pour deux causes seul-
lemēt bien raisonnables. La premiere affin q' ne
moy, ne les aultres Mediciens (mesme de la pro-
uince Lyonnoise) ne soyons mesurez à ton
pied, preiudiciez par ton default, & estimez
estre (pour ne contredire) en telle erreur d'opi-

nion, & peruerſité de Iugement, comme toy.
Car Qui ſe taiſt: ſemble conſentir. L'autre afin
que le Chirurgien, ou autre quelcôque qui
lira le tien traicté Intitule. Paradoxe: ne ſoit at-
traict, & deceu par faulſe doctrine. Pour ces
deux cauſes, ie te vueil tes faultes remonſtrer.
& à toy, & aux lecteurs. A toy, Iouxté le con-
ſeil du ſage Hebreu, diſant. Reſpondz au fol,
ſelon ſa folie: afin qu'il ne ſe penſe eſtre ſage.
Aux lecteurs: Iouxté la loy des douze tables,
qui ordonnent monſtrer la droicte voye aux
deſaillâs, & les ramener de la faulſe, a la droicte.

PARADOXOLEROS.

Et quelles faultes me porrois tu remonſtrer?
toy Statue d'homme. & non homme?

PASQVIL.

Quelles (O bon Dieu) Or pour commencer
l'anatomie du corps de ton traicté: Nous pré-
drons premieremēt le cheſc: c'eſt à dire le tiltre
de l'œuure, qui eſt tel.

PARADOXE DE LA FACVLTE DV
*Vinaigre, contre les eſcrits des Modernes, ou plu-
ſieurs choſes ſont demonſtrées nou eſlongnées de la
verité.* Ce trefambitieux tiltre en parole eſt
impropremal conuenant a la choſe, & en la
ſentence eſt faulx. Car premierement ce mot
Paradoxe (lequel mot en l'appentis de la pro-
priété du vinaigre, tu trauailles à declarer ſans

definition, ne etymologie en te tormentant, par diuers exemples barbares, impertinens, & autant a propos, que Magnificat a matines, & si tu n'en puyz bonnement sortir a ton honneur) Paradoxe (dy le) est chose oultre l'opinion cōmune. & par ce admirable, & tresexcellente. Et en tel sens propre le ha vsurpé Ciceron orateur Rufinian Rheteur, & Alciat iurifconsult en leurs vrayz Paradoxes, Or en telle signifiante ce mot Paradoxe, ne conuient a ton œuvre. Car il n'est point admirable, ne tresexcellent, & si n'est contre opinion commune: ains plustost, est mesme opinion, ou opiniastric tienne, non commune, mais a toy propre & particuliere. Car s'il est contre opinion commune: Il est doncq contraire a l'opinion, & sentence commune, & vniuersele de Hippocras, & Galen. desquelz les opinions suyuent tous les modernes medecins (contre lesquelz tu veulx sembler Paradoxer, & contr'opiner) Parquoy si ton Paradoxe est contre les communes opinions Hippocratiques, & Galenicques. Ia tu te condamnes toy mesme, & te declares scismaticque en medecine, derogant a l'autorité approuée & cōfirmée des anciens Princes en l'art, & premiers maistres. En cela te demonstrent bien estre successeur, & Imitateur de Crinas, & Charmis, tes ancestres, Massiliens comme toy. qui par nou-

uelle arrogance condamnoient tous les anciens
medicins. Or si tu respondz que ton Tracté n'est
point escript contre les opinions d'iceulx, donc
que ce n'est point Paradoxe, & par consequent
le tiltre est impropre.

PARADOXOLEROS.

Et que saiz tu si ie l'entendz autrement? Car
Paradoxe est vng nom Grec de diuerse signi-
fiance.

PASQVIL.

Ha, vrayement (Iaçoit que ie croy, que le grec
ne te cognoit) Si touteffois tu prens *δ'όξα* pour
gloire, & non pour opinion: tellement que Pa-
radoxe signifie oultre passe de gloire. Ainsi cer-
tes ie ne nie pas que Paradoxe ne soit tiltre con-
uenable à ton œuvre.

PARADOXOLEROS.

Tu es maling cauillateur, & quant à mon tiltre:
ie ne l'entens pas ainsi.

PASQVIL.

Et comment doncq? Nullement? D'auantage
l'inscription est faulſe. car cōme les trōpeurs
hostelliers: qui font escrire au tableau de leur
enseigne. Ceans ha bon logis, bon vin, bō foin.
Et neantmoins la maison est veteuse, pluueuse
fumeuse, ruyneuse, ou pestilente, le vin tourné,
aigre, esuenté, le foin, autumnal, & de gros reui-
ure, Iceulx sont criminelz de faulſeté, selon le
respon du prudent Iurisconsult Scauola, &

ſelon la reſolue diſputation de Antipater Sido-
nien, & Diogenes Babylonien. Ainſi es tu coul-
pable de faulſeté: qui en la premiere inſcription
prometz de traicter choſes non eſloignées de
verité. Tout au contraire, par le diſcours du li-
ure, tu traictes pluſieurs erreurs, & faulſetez nō
ſeulement eſloignées de verité: mais diametra-
lement repugnantes à icelle, comme à la pour-
ſuycte de ceſte diſputation clairement ie te de-
monſtreray.

PARADOXOLEROS.

Ha mon amy Paſquil: ne fais tu pas que com-
me les magnifiques portaulx inuitent à entrer
es logis, en derriere tous ruyneux: Ainſi les
beaux, & magnifiques tiltres des liures indui-
ſent à lire tout l'œuvre mal ouuré, & icelluy a-
chepter, & faire bien, & plus cher vendre aux
libraires.

PASQVIL.

Cela eſt courrater les eſcriptures, & non fidele-
ment eſcripre, Parquoy tu ne te puyſ excuſer
du crime de faulx: par la loy Corneliane.

PARADOXOLEROS.

Telle choſe, par le droict coſtumier n'eſt e-
ſtimée deſhonneſte, cōme le met Tulle, au tiers
liure des Offices.

PASQVIL.

Or bien venons du tiltre, à L'epiſtre, Au com-
mencemēt d'une epiſtre quaſi Latine, mal pro-

prement premise au traicté François. Car c'est disparilité, vice defedu par tous rheteurs grecz latins, & françois, par laquelle epistre tu adresses tó Paradoxe à vng medecin du Roy, ou tu dis q les Grecz appellét tous les ars & disciplines *μαθηματικά*. mathemata. Pource que elles enseignent la chose par tresseure, & certaine demonstration.

PARADOXOLEROS.

N'est pas cela bonne definition: pour vne parenthese epistolaire?

PASQVIL.

Non. certes. Car elle ne conuient au definy ne tout, ne seul, ne tousiours.

PARADOXOLEROS.

Pourquoy non?

PASQVIL.

Pource que plusieurs ars, & disciplines se traictent sans demonstration, ains seulement par raison, vsage ou autorité. Comme les trois Sermocinales, & les nobles sciences, Philosophie, Medicine, Iurisprudence, & Theologie. qui sont en ratiocination. experience, vraysemblance, raison, & foy, sans demonstration. Par quoy ceste definition ne conuient à tout art, & discipline, comme tu entreposes.

PARADOXOLEROS.

Qu'est ce, que c art? Qu'est ce que discipline?

PASQVIL.

Je le demanderoie à toy, si ie vouloie en estre confuz, & ne fauoir que c'est Art, Science, Discipline, Doctrine. Saches toutesfois, que les disciplines Mathematicques, demonstrent les choses qu'elles tractent avec certaines demonstrations vrayes, & necessaires. Et icelles sont quatre seulement. Lesquelles Aristote en ses posterieures dict estre colloquées au premier degre de certitude. Or les aultres sciences, & disciplines n'hont pas telle certitude demonstratiue à enseigner les choses qu'elles tractent: parce qu'elles ne sont fondées en demonstration euidēte ou par le sens, ou par les p̄miers vrayes & necessaires, cōme les quatre Mathematicques.

PARADOXOLEROS.

Je ne say que ru dis.

PASQVIL.

Je t'en croy certes. Car aussi ne fais tu en toute ceste epistre dedicatoire, mal latine, incōsequēte, bigarrée, ou pluſtoſt rapetacée de pieces diſconuenantes, tellement que (comme dict Horace) ne la teste, ne le pied ne respond à mesme forme, le ometz les Improprietez, & solœcismes d'ond les petitz grammairiens se peuuent mocquer à bon droict, comme *cogitationem obseruata*. L'inuention des hommes estre le fruyct de tous arts, ce que est *ὑσεργον πρὸς ἑργον*.

de l'accroissement des choses amplifier retro-
gradement à l'atticisme des parolles, *Idioma pe-
regrinam, plæbea nō somnolentas, & commentitias.
multa in literis profecisse. sapere tunicam, tristem in-
scitiam, tristem quartanam, nec iure, nec inique, dolo-
rem lenirem, potius quàm perderem, occupari febrī,
ne non, pro simplici negatione, sanos dies. Vnde, (pro
quare) rem suam tutari, (pro sententia) libelli vale-
tudinem. Et telles aultres elegances dieu secte
quelles.*

PARADOXOLEROS.

Ce ne sont les fautes de l'auteur, mais de
l'imprimeur.

PASQVIL.

C'est cela.

Ainsi l'imprimeur es malfaictz.

Porte des asnes tout le faix.

PARADOXOLEROS.

Va vieil follaistre. T'amuses tu à cela? ne fais tu
pas ce que dient messieurs les Legistes? Nō est
curandum de verbibus: modò habeamus rei
intentio.

PASQVIL.

Et pource ie laisse la reprehension de la parol-
le tant en Latin, que en François, impropre, in-
congrue, sans suycte ne ordre, cheuillée & bi-
garrée à reprédre au vulgaire populaire: lequel
sottemēt tu preferes a tout aultre ordre des hô-
mes, en raison, & doctrine, & victoire d'ignorā

ce, te disant auoir d'icelluy populaire appris les choses meilleures. O disciple digne de tel precepteur, & croyable d'auoir esté enseigné par artisans, charretiers, & portefaix, plustost que par excellens docteurs, & gens de hault estat. desquelz quant ores tu aurois esté appris, encore te montrerois tu tresingrat, preferant à iceulx, le populaire, duquel n'est rien plus idiot ne plus beste. Et neantmoins d'icelluy tu recognois, avec ioye, les meilleurs profictz.

PARADOXOLEROS.

Aussi en sont ilz venuz.

PASQVIL.

Oy paraduventure profictz pecuniaires, que tu has faictz en abusant de la simple bestise d'icelluy, Mais c'est mal conclu en friseromorum: proposer antecedent de raison, doctrine, & iugement au precepteur, & inferer conclusion de profict de bourle au disciple.

PARADOXOLEROS.

Si ce n'est bien conclu en friseromorum: c'est bonne consequence en celarent. Et d'aduantage soubz le nom de populaire: ie vueil cōprendre les grandz homes, & nobles, & sages. Ioux te la definition Iustiniane de *Populus*. es Institutes. *De Iure naturali gentium & ciuili. §. Lex est.*

PASQVIL.

Vela bonne eschappatoire. Or bien c'est assez titulé, & epistolé. venons au principal poinct

qui est la faculté du vinaigre.

Après vne longue Battologie des langues vulgaires, impertinente à ceste matiere, deuât que entrer en propos: ne dis tu pas que le Medecin & le vulgaire (en imitant le medecin) prend le vinaigre pour prompt remede cõtre syncope?

PARADOXOLEROS.

N'est Il pas vray? I'en demande à mon auteur, & docteur. le populaire.

PASQVIL.

Et ie m'en rapporte aux medecins doctes, & exercitez: si pour soubdain remede à la syncope, ilz ne prennent pas plustost le vin, préparé en diuerses manieres selon la diuersité des causes, desquelles peut proceder ladicte syncope, que le vinaigre? Et ce par le cõseil de Galen au liure. xij. chap. iij. de la Therapeuticque.

PARADOXOLEROS.

Mais qu'en veult il dire ce gentil galand?

PASQVIL.

Le vin (dict il) lequel de la nature est chault, & facilement se cuyct, & aussi se distribue par le corps: conuient à tous ceulx qui sont attainctz de syncope. Auquel lieu, Galen ne parle aucunement du vinaigre. Lequel mesme auteur sur la seconde section des Aphorismes, nombre xvij. dict ainsi Le Vin est celluy qui plustost nourrit, & plus abondamment quenulle autre chose. Or comme ainsi soit qu'en syncope, en
ayant

ayant regard plus à l'accident que à la cause, encore que peussions augmenter la cause, soit besoing de reparation des espritz, & multiplication d'iceulx, le vin le fera mieulx, que le vinaigre, & que nulle aultre chose, soit en le beuuât, ou en frottât les poulx, ou en odorant l'odeur du vin, especialement quand le vin est bon il cõforte les esperitz & aussi les vertus du corps fondées en esperitz.

PARADOXOLEROS.

Et le vinaigre n'est ce pas vin, & pource ayant les facultez que tu attribues au vin?

PASQVIL.

Le vin aigre est vin, mais aigre. & n'est nõ plus le vinaigre vin. que l'homme mort, hõme. Dõd aussi il ne nourrit pas le corps, pource qu'il ne se peut conuertir en sang ny en esperit & pourtant n'engendre ne multiplie les esperitz.

PARADOXOLEROS.

Vouldrois tu doncq' nyer que le vinaigre ne fust conuenant remede à la syncope?

PASQVIL.

Oy ie le nye en vniuersel. Vray est que il pourroit conuenir à quelque particuliere syncope, prins regard à la cause d'ond elle procede, & icelluy encore meslé en le beuuât, ou frotât les poulx, ou en l'odorant. Laquelle particuliere cause ie ne exposeray maintenant. Car mon in-

tétion n'est de icy traicter la curation de syncope pour ne extrauaguer cōme toy. Mais declarer ton paradoxe & paraloge cacquet de la faculté du vinaigre, estre en plusieurs choses esloigné, de verité, escript trop legierement, & sans iugement.

PARADOXOIROS

Et quoy plus?

PASQVIL.

Au mesme lieu tu dis que le vinaigre est vtile pour preseruer l'homme de peste, pource qu'il corrobore les vertus, singulieremēt les vitales, lesq̃lles corroborées singulieremēt resistēt au venin. & ce, nō pour resserer les pores, cōme tu dis.

PARADOXOLEROS.

Cela, est ce erreur?

PASQVIL.

Manifeste. Car le vinaigre froid, & sec de sa nature, & de soy par telles qualités cōtraire aux esperitz, qui sont chaulx & humides, ne corrobore point iceulx espritz; ne par consequēt les vertus fondées es esperitz.

PARADOXOLEROS.

Pourquoy non? Et quelle choses myculx les corroborent.

PASQVIL.

Choses chauldes, & humides, & de subtile substance: mesme quād elles sont de bōne odeur, comme le bon vin odorant. & telles aultres. ✓

PARADOXOLEROS.

Vouldrois tu doncq du tout nyer que le vinaigre ne corroborast les espritz, & vertus, & ne fust bon contre la peste.

PASQVIL.

Non en tout, & par tout. Car il est veritable q le vinaigre pourroit corroborer accidentale ment qlqun ayât discrasie de coeur, chaulde & humide hors de nature, reduysât icelluy en sa température naturelle. Semblablement qui auroit le coeur froid & sec temperément de sa nature sans excès, en le conseruant en sa temperature naturelle. Le vinaigre aussi accidentalement garde q les humidités près du coeur, prestes a se corrompre facilement, ne se corrompēt : & ce, ou l'odorant, ou en frottant les poulx, ou en v-sant mediocrement es viandes ordinaires.

Le vinaigre de rechef, faiēt accidentalement vnir les espritz, & les vertus, à cause de sa frigidité dominante, et siccité lesquelz espritz : vniz sont plus fors que parauāt. Car la nature du vinaigre est, après auoir penetré ou on l'applicque, restraindre, & reserrer les pores, (comme plus à plain cy après nous prouuerons, en declarant sa nature) & ce à cause de sa qualité seiche & froide en luy dominante. Et pource garde que l'air corrópu ne penetre dedās le corps.

PARADOXOLEROS.

Que veulx tu doncq dire, Cela ne faiet il pas pour moy, & contre toy?

PASQVIL.

Il est bien vray que en ces trois manieres dernieres, le vinaigre est vtile contre la peste, & peut bien preseruer l'homme de tel venin. Mais cela se faiet accidentalement, non substantialement.

PARADOXOLEROS.

Je ne me soucie, ou occidentalement, ou orientalement, mais quil soit ainsi que ie dyz.

PASQVIL.

D'aduetaige à toy qui te fais medecin, est faulte bien plus enorme prédre vne maladie pour aultre, en faisant de beaulx comptes.

PARADOXOLEROS.

Comme quoy?

PASQVIL.

Comme disant auoir veu vne femme sans interieur medicament, avec ius d'herbes seullemēt guerir la tache de l'oeil dicte en latin *ungula*, en grec *ωτὶς γύριον*.

PARADOXOLEROS.

N'est ce pas proprement rendu le latin en grec & monstré en sauoir quelque chose.

PASQVIL.

Oy vrayement, ne fust que l'orthographe du nom grec mal obseruée es lettres latines, decouure lignorace du tourneur grecule affecté.

PARADOXOLEROS.

Net'ay ie pas protesté que ce sont fautes de
l'imprimeur *Santo de dio*.

PASQVIL.

Charge, charge le mulet. Mais dire que la tache de L'oeil, est *ungula* ou *pterygion* ce est confusion, & non verité.

PARADOXOLEROS.

Confusion?

PASQVIL.

Oy confusion, confondant maladies diuerses en vne mesme espece. Car la tache de l'oeil, & *ungula* ou *Pterygion* sont maladies bien differentes. Et pource les Medecins anciens, tant Grecz, que Arabes, hôt faict chapitres differés d'icelles maladies: & aussi la guarison en est bien differente. Et iasoit que mon intention ne soit pas icy de parler de la difference des maladies ne de la guarison d'icelles. Je suis cōtrainct toutesfois de ce faire pour te monstrier ta lourde faute.

La tache de l'oeil est maladie de la *cornea*, laquelle est sur la pupille de l'oeil, Et quand icelle tache est subtile: des medecins est appelle *Nebula*, quand elle est grosse, *Albugo*. Et souuentefois icelle tache est vne cicatrice, laquelle demeure apres la guerison des vlceres d'icelle *cornea*, qui est deuant la pupille. Quelque fois aussi decourt vn humeur pituiteux, subtil, le

quel passe toutes les tunicques des yeulx, ius-
que à la tunicque *cornea*. Aulcunes fois icelluy
humeur s'arreste à la superficie de dehors *cor-*
nea. Aultres fois pource que icelluyumeur est
plus gros il demeure à la superficie concaue
de la *cornea*: Quand la tache de l'oeil est vne
cicatrice, il est impossible de la guerir, specia-
lemēt si elle passe iusque à la superficie cōcaue
de la *cornea*: icelle tache se peut guerir és enfans
si elle est exterieure, & superficielle, mais si elle
est profonde, ne se peut guerir: mais biē se peut
decorer. Et quand icelle tache prouient d'hu-
meur pituiteux, elle peut estre guerie facilēmēt
après que le corps soit euacué des humeurs su-
perfluz, avec medicamēs absterfisz, & diapho-
reticz, ayans quelque astrictiō: de laquelle ver-
tu sont plusieurs pouldres, eaux distillées, ius
d'herbes: comme ius de pautot rouge de la cen-
taurée mineur, & aultres de semblable efficace.
Voila l'exposition de la tache de l'oeil selō ses
especes, Mais *ungula* ou *pterygion* (puy que
tant es affecté en ton Grec) est vne superfluité
semblable à vng nerf laquelle viēt sur la *cornea*,
cōmenceant son origine le plus souuent sur le
lacrymal grād, & se estēdāt sur la dictē *cornea*,
Laquelle superfluité quelque fois croist tant,
qu'elle couure toute la pupille. Galen au pre-
mier liure de la differēce des maladies dict que

ungula est maladie en nombre adiousté, & surabondant, de telle sorte, que est le sixiesme doigt en celuy qui en ha plus de cinq. De laquelle *ungula*, les anciens medecins mettent tousiours quelque difference, tant à la couleur, blanche, rouge, rousse, liuide, ou plombée: que à l'attouchement, estant molle, dure, adherente separée, de fondement grand, ou petit, comme aussi au tēps, l'une auenir, l'autre vielle: lesquelles differences tu trouueras (si tu les veulx & fais chercher) en Paul Eginet. Corneil celse, & Auicēne, Galen Aetio *Ungula* cōmēcāt à venir est molle au tact, blanche en couleur, & lors se peut guerir avec medicamens absterisifz, lesquelz doibuent estre plus fortz qu'en la tache de l'oeil appellée *Albugo*. Quand elle est dure, & adherēte ne la fault toucher, ne essayer de la guerir. Quand elle est molle, & son fondement est extraict, & aussi quelle ne soit pas adherente, le plus souuent elle est guerie avec operation manuelle, & peu souuent avec medicamens locaux se guerit. Finalement si tu has leu Corneil celse. au 7. liure, Paul Eginete au 6. liure *Aetius* au 7. liure: Auicēne Fen. 3. Galen. 4. de compositione medicamentorū secundum locos, tu trouueras differēs chapitres de la tache de l'oeil appellée *Albugo* λεύκωμα, & de

ἄνγυλα, ἀντιγύγιον. Parquoy mō amy recognois
& confesse, que tu prens vne maladie, pour
autre.

PARADOXOLEROS.

Rien, riē, ce n'est pas ma costume, Recognois-
sances obligent, & confessions sont preiudicia-
les, ie nen vſe point. Mais ie nomme generale-
ment tout vice des yeulx troublāt & diformāt
les yeulx & la veue, tache de l'oeil: Or le pren
comme tu voudras. Mais toutesfois i'ay veu
l'experience que ie t'ay dictē.

PASQVIL.

Il nē fault pas plourer: par aduēture qu'il n'est
pas vray: Ce sont de beaux cōptes non parado-
xes, mais parergues, & hors de l'argument. les
quelz la plus grand part nous sauons estre fabu-
leux ou hyperbolicz, & pource (dict Socrates
des escriptz de Heraclit) estimons tous les aul-
tres estre telz.

PARADOXOLEROS.

Si l'ay ie veu, de mes yeulx.

PASQVIL.

Ce n'est pas de merueille. car possible est que
icelluy corps parauant estoit euacué des hu-
meurs superfluz. Car aultrement icelle femme
en applicquant tel remede, sans premierement
auoir euacué les mauuais humeurs, luy heust
faict plus de dommaige, que de profit.

PARADOXOLEROS.

Je dy bien d'aduantage que auant l'application
faicte par ladicte femme, plusieurs Medicins
n'y auoient sceu que faire.

PASQVIL.

C'estoient doncq' Medicins: ou plustost Pseu-
diatres discordans & quereleux en cōsultatiō,
cōme toy, qui en tout le Broillis de ton Parado-
xe, te demōstres estre naturellemēt mesdisant,
quereleux & langagier, trop plus que docte.

PARADOXOLERQS.

Il n'est pas vray.

PASQVIL.

Je le monstreray vray. Car au lieu de traicter la
faculté du vinaigre par bōne methode, & suicte
de propos ordōnez, tu faultes du coq à l'asne,
nō entrelaceāt, mais entrebrisant plusieurs di-
uers propos, maintenāt maledicques, puis theo-
logicz, en apres legistes, puis aulcunemēt philo-
sophicz, & puis fabuleux ou historicz, tellemēt
quil semble que tout ce peu q̄ tu has leu, le ayes
voulu enfarcir en ceste cote mal taillée. Et
apres auoir cōsommé plusieurs fueilletz à tour-
noier ainsi à l'entour de la porte de l'argument
sans y entrer, tu te esmerueilles toy mesme (cō-
me vng paon de sa queue) de tō hault parler, &
de ta belle digression (si dieu plaiēt): cōme si
vng viateur se plaisoit à soy mesme d'auoir erré
par mons & vaulx, ca & la, par landes & bois,

& tous chemins desuoiez, en laissant au lieu la droicte voye, & par ce n'estre entré ou estoit le but de son pelerinage.

PARADOXOLEROS.

Variété delecte nature en toutes choses, mesme mentés escriptz.

PASQVIL.

Il est bien vray si elle est entregectée, & entresmée sans rompre le fil de l'oraison.

PARADOXOLEROS.

Ne faict il pas beau veoir vng habillemēt enrichy de belles brodeures?

PASQVIL.

Oy vrayement, mais que la forme de l'habillement y demeure inuiolée. Mais au contraire faict il pas laid veoir vne mâte de coquin, sans forme de vesture, repetacée de toutes meschantes pieces de diuerses couleurs, amassées par les rues, es esquouilles des Bobelineurs.

PARADOXOLEROS.

Veulx tu dire que ma digression soit telle.

PASQVIL.

Nó la digressiō seullemēt, mais tout l'oeuure, duquel les diuers propos non seulement sont mal conuenans, & dissemblables, mais aussi contraires les vngz aux autres.

PARADOXOLEROS.

Ie nye biē fort cela. Car i'ay aprins mon caton.
Sperne repugnando tibi tu contrarius esse.

PASQVIL.

Tu l'has bien appris: mais mal retenu.

PARADOXOLEROS.

Verbi gratia?

PASQVIL.

Verbi gratia? Comme en disant que la contro-uerse du vinaigre estoit entre deux chirurgiés, desq̃lz l'vng & l'autre soubstenoit & prouuoit son dire par raison, & autorité: & puy après en la poursuyte du discours, dict l'vng d'iceulx, aueugle de raison auoir affermé le vinaigre astringent.

Item dire par les modernes auoir esté, trouuez remedes aux maladies incogneues, ce q̃ est nō seulement contradictoire, mais impossible. Car cognoistre la maladie, est principe du remede.

PARADOXOLEROS.

Pentens incogneues par auant: par ampliation à quatre temps.

PASQVIL.

C'est bien sophisticqué. *Quod fuit, vel est, vel erit, vel esse potuit.*

Item dire Galen irrefragable, & en aultre lieu quil n'est necessaire soy arrester à son autorité.

Item dire que au 19. 20. 21. 22. 23. chapitres des simples. Galen ne se oblie d'affirmer que

le vinaigre soit astringent & incontinent apres qu'il n'en heut iamais opinion Itē soy soubz-
stenir en vng lieu de l'autorité de *Aetius* & en
vng aultre dire que à vng bēsoing on le peut
nyer, Itē dire que les Arabes ont oppugnē la
doctrīne des Grecz, & Auicenne prince entre
les Arabes se proteste interprete du grec Galē.
Item se dire estre iuge entre les contendans,
& puis se faire partie, vela de tes belles concor-
dances d'escripture.

PARADOXOLEROS.

Ay ie dict tout cela? Ce ha doncq' este sans y
penser:

PAS QVIL.

D'aduantage du petit caton (duquel tu dis tant
bien fauoir) tu has obliē ce verset.

Turpe est doctori cum culpa redarguit ipsum.

Car (apres Galen) tu vitupere les logiatres c'est
a dire medecins parolliers, qui se arrestent es
noms, entre lesquelz tu me semble le plus no-
minal, disant de fois à aultre (comme si tu ense-
gnois de petitiz enfans) vne telle chose en latin
se nomme ainsi, & en grec ainsi, & ce non vne-
fois, ou deux, mais tant souuent que le lecteur
s'en doibt fascher, ie croy que c'est pour em-
plir papier.

PARADOXOLEROS.

Cen'est pas cela. Mais pour plus facile intelli-

gence en la synonymie des langues.

PASQVIL.

Mais plustost par affectée ambition de mon-
strer que tu has gousté du grec, dond tu ne co-
gnois aulcunement la faueur.

PARADOXOLEROS.

Qui moy?

PASQVIL.

Il en appert. Quand tu ne sces pas mesmemét
rendre lettre latine respondâte à la lettre grec-
que. car καταγεν in grec tu escripz. catageni en
lettres latines, tournant improprement vng «
grec en vng i latin, ignorât que «, est vng ε λόγ.
en suyuant l'asnerie de ceulx qui souloient di-
re *paraclitum*, pour *paraclétum*. tresbiē redarguez
par François Philelphe. Or regarde doncq' que
tu n'es pas seulement elementaire en grec, du-
quel tu fais tant de mines, pour la quelle con-
sciēce de ton infirmité ie croy que tu te rues
ainsi sur les greciseurs. Mais (comme dit le
prouerbe) les chiens abayent à ceulz qu'ilz ne
cognoissent point.

PARADOXOLEROS.

Tout cela ne sont que parolles.

PASQVIL.

Ce sont parolles ioinctes aulx choses mais ve-
nons a la principale, qui est de la faculté du
vinaigre, & sans affection ny passion, conside-
rons desquelz est la sentēce plus veritable, ou la

tienne, ou celle de Messieurs Martin Acacia,
Tagault, Holier, sauans docteurs de Paris en
medecine, vido de vidis docteur, Medecin, Ita
liem, Fuchsius docteur Medecin, Allemant,
tous sauans, & bien exercez en l'art de
medecine, Tous lesquelz en leurs escriptz
suyuans Galen, lumiere des Medecins, Mettent
le vinaigre auoir astringion.

PARADOXOLEROS.

Et i'ay dict, & dy le contraire.

PASQVIL.

Or examinons lequel dict le plus vray. Et
premierement auant que de combattre par
autorités, affin que nous ostions toutes equi-
uocations. Quand nous demandons si le vi-
naigre est astringent: nous n'entédons pas qu'il
ayt astringion vehemente comme les Gales,
Sumac, *Atramentum suiorum*: Mais nous enté-
dons, si le vinaigre ha aulcune astringiō, encore
qu'il ayt aultres facultés contraires qui domi-
nent en luy. Car à la mesme maniere que vng
medicament peut estre froid, chault, humi-
de, sec en premier, second, tiers, & quart degré:
aux mesmes degrez vng simple pourra estre
astringent. Laquelle chole preluppōsee, enten-
due, tu seras batu des mesmes bastōs desquelz
has voulu frapper si grand nombre de gens
doctes.

PARADOXOLEROS.

Ha, tu fais du mauuais, & menaces de battre, pour ce q̃ tu portes vn bastón: scays tu quoy, d'estre batu ie n'en ay cure; entès le puerbe italiẽ.

Dy ce que voudras de la bouche:

Mais de la main point ne me touche.

PASQVIL.

Aussi ne vueil ie vs̃er sinon de la bouche, & du premier ciceronian genre de concertation, qui est par raisonnable parollẽ; duquel ie te attein dray plus viuemẽt au coeur, & au cerueau, que ie ne pourroie, neouldroie faire de mō baston de main.

PARADOXOLEROS.

Ie te rabatray bien tes coups.

PASQVIL.

Or le voyons.

En premier lieu, Dioscorides (auteur que tu ne puis, ne doibs reprouuer) au liure 5. chapitre II. dict le vinaigre estre astringent.

PARADOXOLEROS.

Hau, ne scays tu pas cōme i'ay rebatu ce clou? en reiectāt l'autorité de dioscorides, quāt à la faculté des simples, aultrement prouuable en la description?

PASQVIL.

Mais qui t'ha appris à ainsi partir Dioscorides, & le tailler en deux pieces par vne bonne, l'autre mauuaise.

PARADOXOLEROS.

Qui? c'est Galen qui dict ainsi. Je me deporté de parler de la figure des herbes, pource q̄ ceste matiere ha este traictée tresamplemēt par Dioscorides, auquel lieu le louāt de la description, raisiblement il reiecte la faculté, laquelle (s'il l'heust approuuée) il ne heust passee soubz silence. Par quoy quant à la faculté des simples, l'autorité de Dioscorides n'est à recevoir.

PASQVIL.

Qui t'ha appris à si mal syllogiser que d'une affirmatiue, cōclurrevne negatiue en choses nō opposites? Sēfuyt il: Aristote est approuué en methode, dōc q̄ il n'est pas propre en parolle, Il est Philosophe, dōc q̄ il n'est pas Rheteur. Il est moral, ergo il n'est pas naturel, Platō est diuin Philosophe, dōc q̄ il n'est pas eloquēt orateur. Ainsi Dioscorides est approuué par Galē en la description des simples, parquoy il n'est pas receuable en la faculté. O Dieu quelles cōsequen- ces de crottes de chieure, que les rustiques ne feroiēt pas. Et ne cōclurroiēt ainsi, Tyuain est bon au labourage: Parquoy il ne vault rien au pasturage, Alizon est bōne bergiere: donc elle n'est pas bonne mesnagiere. Bayard est bon au harnois, parquoy il est mauuais cheual de selle. Brief ton argumēt ne vault rien, & est inconfes- quant fust ce deuant Petrus hispanus, Maioris, Dangeſt, Mandeston, ou Crab.

Parado-

PARADOXOLEROS.

Comme doncq' me prouueras tu que Dioscorides soit docteur, & receuable en la faculté des simples?

PASQVIL.

Il se peut prouuer par cela, que Galen fuyt Dioscoride, & ne luy cōtredict, & mesmement en parlant de la faculté du Vinaigre: car toutes les facultés que Dioscorides, attribue au vinaigre, Galé les appreuue. Mais mō amy Paradoxeur, ie te voy bien desia rougir de honte, de nyer Dioscorides, pource rendz toy à sa mercy.

PARADOXOLEROS.

Penses tu qu'il faille entendre Dioscorides littéralement? Nenny non, il le faut prédre en autre sens.

PASQVIL.

Quel sens ie te pry? tropologic, allegoric, moral, anagogic? est il Theologię mystic, ou Poete mythologic: pour y chercher autre sens q' literal?

PARADOXOLEROS.

Literal, mais bien autrement que tu ne le prés.

PASQVIL.

Comment doncq'?

PARADOXOLEROS.

Quād Dioscorides dict le vinaigre estre astringent: il se doibt entendre (comme i'ay escript) vniuersellement, sans particulariser.

PASQVIL.

Bon, bon. Vrayemēt si celluy est le sens de Dio-

scorides. Il faict du tout contre ton opinion. Car si Dioscorides entéd (commen tu dis) que le vinaigre vniuersellement soit astringent, Selon ton tel sens tout vinaigre sera astringent tant blanc, que claiet, gros, que subtil. Car tous sont d'ung genre, ou espece, & tous hont astringtion selon plus ou moins : ce que ne varie en rien l'espece. Mais pour t'ayder, (affin que non du tout abbattu tu puisses suffire aux coups suyans.) Je te releueray d'inaduertence, disant que tu pensois dire le contraire, cest à sauoir q̄ Dioscorides ha parlé particulièrement, & non vniuersellement: ce que donne à entendre ceste similitude du vin disant. Cōme il se peut trouuer quelque vin gros, & astringēt, d'aulture subtil, & penetrāt, En pareille sorte se pourra trouuer quelque vinaigre gros & astringent, d'aulture subtil, & penetrant.

PARADOXOLEROS.

Or prens le cas que ie l'entende ainsi.

PASQVIL.

Rien Rien. Ce sens la est à la verité contre Dioscorides. Car quand il dict le vinaigre estre astringent, il ne parle pas particulièrement ne determinément d'ung vinaigre gros, & seculent, ains entend vniuersellemēt tout vinaigre auoir astringtion selō plus ou moins. En la mesme maniere comme quand Dioscorides parle

de la faculté d'ung aultre simple, il en parle en general (comme dogmatic) & entend que tout aultre de la mesme espece, (combien que de diuerse forme, figure, ou circonstance) ayt mesme vertu, selon plus ou moins, A quoy Galen imitateur de Dioscorides, n'ha voulu estre dissonant.

PARADOXOLOS.

En quel lieu Beau sire le trouues tu?

PASQVIL.

Au 6. liure de catatopous, ou parlât des vlcères de la bouche, il met vn medicamēt escript par Andromach, duquel la totale p̄scription ie ne vueil mettre pour cause de briefueté Réuoyât au lieu allegué. Galē dōcq examinât la dictē cōposition ainsi par tel ordre que sont mis tous les simples, dict notamment que les galles, le vinaigre, & le sumach sont les plus astringens & repellissans: & ainsi afferme le vinaigre estre astringent & repellent, aussi le sumach, & les galles.

PARADOXOLOS.

O chose ridicule, dire que le vinaigre astringēt cōme les galles, & le sumach, qui sont simples tres astringens.

PASQVIL.

Ie ne dy, & n'entendz que le vinaigre soit astringent en pareil degré que les galles & le

Sumach. Mais ces trois simples meslez ensemble, astraignent fort, pour cause du vinaigre mesle avec les deux autres vehementz en astringtion: lequel vinaigre pour estre de tenue substance, donne penetration aux aultres simples: (especiallemēt le vinaigre blanc) & ce beaucoup plus, q̄ si les deux aultres simples estoient seulz, ou meslez avec d'autre liqueur.

PARADOXOLEROS.

O poure homme insensé? ne cognois tu pas que tu te cōtraries à toy mesme: disant q̄ le vinaigre astringt, & puis q̄ il penetre q̄ sont repugnātes facultez, & qui ne peuuēt estre ensemble en vng mesme, par la reigle des dialectitiens?

PASQVIL

Si sont bien par diuerses raisons & regardz, cōme au vinaigre sont diuerses qualitez mesmemēt contraires, ainsi diuerses facultes voire opposites, iasoit que non ensemble, & à vne fois.

PARADOXOLEROS.

Declare cela plus ouuertement.

PASQVIL.

Vug mesme hōme peut estre pere, & filz: pere au regard de ses enfans, filz au regard de son geniteur encore viuāt. Le diable est bon par bōte de l'essence cōme crée de Dieu q̄ ha faiēt toutes choses bōnes, & si est mauuais par malice de ses mœurs deprauez. N'has tu pas leu le ver buco-

lic, *Limus, vt hic durescit, & hac vt cera liquefcit.*
Vno eodemque igni. ou le poete attribue au feu fa-
cultés cōtraires de endurcir & mollifier . Ainsī
cōbien q̄ le vinaigre par sa subtile substāce face
penetrer, aussi par apres dōne quelqs astrictiō:
laquelle pourra estre au cōmēcemēt du second
degré, & cecy a cause de sa frigidité, & siccité do-
mināte audict vinaigre: lesquelles sont qualités
astringētes. Or la ou il y ha qualité astringēte, il
est necessaire qu'elle astraigne, referme, & refroi-
disse les corps prochains ou elle touche: Or cela
faict le vinaigre: Parquoy il est astringent.

PARADOXOLEROS.

Je pēse moy & ay biē osé affermer, que Ianus
Cornarius s'est monstré Ian cornard en la trās-
latiō de ce lieu, laissant le texte de Galē ainsī
corrumpu, & mendeux par faulte d'inaduer-
tence, comme i'ay dict.

PASQVIL

Vela bien parlé, par faulte d'inaduertēce . Tu
cuydois dire par faulte d'aduertēce. Car faulté
d'inaduerterence est souuerainé diligence, & ob-
seruance. Tu parles comme le Populaire ton
maistre . q̄ dict vng hōme estre en necessité de
maladie ou il n'en ha besoing, ains en est tout
réply, & appelles vng hōme omnipotēt, quād
il est impotent de ses membres.

PARADOXOLEROS.

Tu cauilles tousiours les parolles.

PASQVIL.

Tu parles tousiours mal. Mais dy moy, Beau fire, en quoy ha failly Cornarius sur la translation de ce lieu de Galen.

PARADOXOLEROS.

En ce que ou Monsieur l'intrepreteur ha mis vinaigre: Il y falloit mettre alun, & dire ainsi. Les Galles, le Sumac, & L'alun, sont les plus astringens, & repellissent fort.

PASQVIL.

Vrayement, nous sommes grandemēt tenuz à ce nouuel interprete, qui si fidelement nous restitue Galen en ce lieu.

PARADOXOLEROS.

C'est le debuoir des literez, & accroissement des sciences, ainsi corriger les erreurs les vngs des aultres.

PASQVIL.

Oy avec raison mieulx valente. Mais quelles raisons tant puissantes has tu pour sugiller premierement vng tant grand homme, tant en la medicine que es lāgues, toy qui n'has nulle ou bien petite cognoissance de la lāgue Grecque? Lequel docteur en traduisant ce passage de Galen ainsi qu'il est en l'exemplaire Grec, ha suyuy & du tout exprimé en latin ce que Galen ha heu intention de dire en Grec. Comment has tu osé si confidemment muer la le-

ecture ancienne par tant de siècles, & tant de
sauans hommes inuiolablement obseruée, & gar-
dée en son entier, sans aucune doute? Quel-
le cōiecture prouuable te induyt à si temeraire-
ment changer le mot avec la chose, veu que il
n'y a aucune apparence de corruption des let-
tres, ne des syllabes tant au Grec cōme au La-
tin? Car quelle affinité ou similitude littéraire,
syllabique, ou dictionnaire y ha il entre *similia*
& *ōgos*, *alumen* & *acetum*? nulle certe par laquel-
le on puisse coniecturer l'ung auoir esté suppo-
sé pour l'autre. Parquoy est trop temerairement
faict à toy changer, & supposer ta faulx, & im-
pertinente diuination, pour l'atque & vraye
diction encore en redarguant vng homme de
trop plus grāde credence, & plus grand fauoir
que toy, sans aucune comparaison.

PARADOXOLEROS.

I'ay vrayement escript, & encore vueil soustenir
qu'il y fault alun & non vinaigre: ce q̄ on peut
cognoistre par les parolles subsequētes, car Galē
en parlāt & examināt vng chescū simple scēlōsa
faculté, d'icele cōposition a la fin de tel examen,
il parle du vinaigre ainsi qu'il sensuyēt cer-
tainement de la faculté du vinaigre desia plu-
sieurs fois en auons parlé, & auons dict qu'il re-
percute, diuise, separe, penetre, & qu'il est de ten-
ue substance, & plus quand il est blanc que

d'aulture couleur: comme en nostre presente re-
cepte, & composition fault qu'il soit. Vela cõ-
ment il parle du vinaigre en tel lieu allegué
par melsieurs les faulx interpreteurs. Car si
auleun vinaigre se trouuoit astringent: ce ne se-
roit le blanc, moins que tout aulture. Doncq'
fault conclure que par auant, en parlant des
galles, Sumach, ou bien Rhus, qu'il ne faillõit
mesler le vinaigre pour dire qu'ilz estoient
bien astringens, & de l'entendre du vinaigre
aussi bien que des galles, & Sumach mais
plustost au lieu du vinagre mettre l'alun.

PAS QVIL.

Pour quoy cela?

PARADOXOLEROS.

Pource que particulièrement par auant n'ha
point parle de l'alun comme des aultres sim-
ples: Et que du vinaigre il en ha parle à la fin
aultrement, & en aulture opinion, que de l'affer-
mer avec les galles & Rhus estre bien astring-
gent, ioingt qu'il heust plustost mis vinaigre
rouge, ou seculët, que vinaigre blanc.

PASQVIL.

Que Galen n'heust point parlé au par auant
de l'alũ: Cela est faulz. Car examinãt d'aulters
cõpositiõs, esq̃lles l'alũ entroit, il l'auoit desia
examiné. Et pource heust este chose super-
flue de faire repetitiõ de la faculté du dict alũ.

Attendu aufsi que nul entendant le grec, ne
 peut ignorer l'alun auoir grande astringtion,
 meisme par la denomination autonomastique
 du mot *συσφιγνῖα*, lequel par grande excellence,
 d'astringtion (comme dient les grec) *κατ' ἐξοχὴν*
τοῦ συσφιγνῖου, signifie alun. D'aduantage, si Galen
 heust dict (comme tu le veulx restituer) les
 galles, l'alun, & le sumach estre astringens, & re
 pellens, il se fust contredict à soy meisme. Car
 l'alun combien qu'il soit vehemément astring
 gent, touteffois, n'est pas repellét: Pource qu'il
 est chauld, & sec, & les repellens de leur nature
 sont froidz: ainsi que dict Galen 6. lib. de compo
 sitione medicamentorum secundum locos. Mais
 que Galles, vinaigre, & Sumach sont vehemē
 tement astringens, & repelliſſent, il ne se con
 tredict pas, mais dict la verite car chascun de
 ces trois simples est froid & sec. Parquoy en
 vain tu te efforces de tirer Galen a gueule tor
 se en ton peruers erreur.

PARADOXOLOS.

Mais que respondras tu, à ce que deſſus iay al
 legué, que Galen se dict auoir parauant parlé
 de la faculté du vinaigre, q repercuté, diuiſe, ſe
 pare, penetre, & ſans mētion faire d'astringtion.

PASQUIL.

C'est pour mōſtrer q le dict vinaigre oultre
 l'utilité qu'il faiſt meſlé avec d'autres medica

mens, pour les faire penetrer, encore il incide, discute, & repellit: & ce avec astrictiō cōme icel luy Galen ha dict par auant. Or les repercuissifz lequelz repercutent avec astrictiō, sont les plus excellens, là ou tu has failly bien lourdement, & par grande ignorance, disant que Galen veult q̄ les medicamēts qui astraignent, & condensent les pores, & conduictz, & aussi viennent à lyer, & retenir la substance & humeur des parties prochaines, soient contraires aux medicamens repellans, Laquelle chose est du tout faulse, & toy mesmes ne sces que tu veulx dire, & n'entendz aucunement Galen. Car les medicamēts vrayz repellens font telle operation. Et ce est la definition du medicament repellant.

Et pourtant que c'est sa definition luy doit conuenir, & ne luy doit estre contraire, ainsi comme il dict.

PARADOXOLEROS.

Cuydes tu que ie ne sache quelz sont les repellens, & que ie n'aye leu Galen aussi biē comme toy, voire mieulx.

PASQUIL.

Si tu l'auois biē leu au 6. liure Catatopous tu en heusses parlé plus sagement. Car là Galē faict mention de deux sortes de repellans. Les vngz sont froidz seulement: & iceulx condensent les pores & conduictz: les autres froidz secz & astricti-

gēs, lesq̄lz Galé dict qu'ilz repellissent mieulx,
condēsent plus les pores, aussi retiēnēt plus les
humeurs des parties prochaines. & sont plus
froidz que les premiers. Desquelz aussi ledict
Galé parle au 5. des simples chap. 17. Tu trouue
ras aussi ces deux manieres de repellēs, en la me
thode therapentiq̄ & en plusieurs aultres lieux.

PARADOXOLEROS.

Tout ce que tu has dict ne me scauroit donner
à entēdre que Galen soit en l'opiniō de Diosco
rides, quant à estre le vinaigre astringent.

PASQVIL.

Or si cela ne suffict, lis au premier liure des sim
ples chap. 19.

PARADOXOLEROS.

Je say bien que tu veulx dire, ie l'ay bien leu.

PASQVIL.

Mais mal, & malicieusement, car sur icelluy lieu
tu calūnies avec grāde mēsonge, ceulx qui dient
que le vinaigre ha astrictiō, en affermāt impu
dēmēt que en cest endroiēt Galé ne faiēt aulcu
ne mētion du vinaigre: ce qui est contraire à la
verité. Car en celluy chapitre Galé parle du vin
aigre quand il dict qu'il reprime la fluxion du
sang, non pas comme medicament caustique,
mais de la maniere comme font les medica
mens astringens.

PARADOXOLEROS.

Que say ie si le lieu ha esté bien translaté.

PASQVIL.

Je croy bien que tu n'en fais rien. Mais ie sçays bien aussi que tu ne le saurois nyer. Car toy mesme en ton oeuvre has confessé que là endroict Galen ne se soit oblié d'affirmer qu'il soit astringent (côme par auant nous te auous monstré en tes contredictes.

Or d'aduantage veulx tu que ie te coupe la gorge de ton costeau mesme?

PARADOXOLEROS.

Nenny, non. Car ie saignerois. Mais parle seulement.

PASQVIL.

Ne has tu pas escript, que le vinaigre est vtile à retirer la vuule relaschée?

PARADOXOLEROS.

Oy vrayement & le vueil soustenir.

PASQVIL.

Et ie le recoy. Or entens maintenant mon argument. Hipocrates dict que les contraires sont curez par leurs contraires. Or astringtion est contraire a relaxation: le vinaigre doncq curât relaxation de vuule, tient de astringtion.

PARADOXOLEROS.

La maieur de ton argumēt (qui est le Aphorisme de Hippocrates.) n'est pas vniuerselle, ne tousiours necessaire.

PASQVIL.

Or puis que tu ne veulx croire en argumēs syl-

logiftiques. Le vſeray de demonſtration fondée
& prinſe de ſens.

PARADOXOLEROS.

Comme quoy?

PASQVIL.

Tout médicament qui cōdenſe le corps, lequel
il touche, & le reſerre incōtinent & auſſi le rēd
aſpre, icelluy eſt aſtringent:ceſte eſt la maieur
irrefragable *ab effectis*. Or le vinaigre condenſe,
& ſerre les parties attouchées avec aſperité ſelō
plus ou moins: dont ie conclu que le vinaigre
ha aſtriſtion.

PARADOXOLEROS.

Ie nie la mineur, & ta conſclusion.

PASQVIL.

Elle eſt prouuable par le ſens. Et quelle inſtan-
ce pourrois tu faire au contraire?

PARADOXOLEROS.

Telle inſtance. Que ie dy tout aſtringent eſtre
de groſſe ſubſtance, & nul médicament de ſub-
ſtance tenue n'eſtre aſtringēt. Or eſt le vinaigre
de ſubſtāce tenue: Parquoy impoſſible eſt qu'il
ſoit aſtringent.

PASQVIL.

Or ie te prouue le contraire par vng exemple
de Galen au 6. liure Catatopos chap. 2. ou il
cōpte, que retournāt d'Alexādie en ſon pays,
par les champs trouua vng Iardinier, lequel e-
ſtoit quaſi ſuffoqué d'une fluxiō, laquelle luy

tomboit sur la bouche:auquel Galen conseilla qu'il se gargarisast du ius d'escorce de noix verdes,coulé,& cuiet avec miel. Auquel lieu Galé manifestemēt demōstre le ius d'escorce de noix verdes,estre fort astringent:iasoit qu'il est de tenue substance.

PARADOXOLEROS.

Mais cōment preuue Galen ce ius de noix estre de tenue substance?

PASQVIL.

En telle forte & euidēte demōstration. Les choses qui penetrent facilement sont de tenue substance,or celluy penetre facilement.Et qu'ainsi soit.A ceulx qui hōt esqualé les noix, l'asperité, & noirceur des mains ne s'en va pas incōtinēt, ores qu'ilz les lauent,& nettoyeut fort.Or ne seroit il de si difficile nettoiyement,& abstersion: s'il n'estoit de substance tenue,& neantmoins il est astringent. Parquoy il est faulx ce que tu as dict que tout astringent est de grosse substance. Je te dy bien d'auantage. En ce lieu mesme dict Galen que beaucoup vault l'astriction laquelle est fondée en substance tenue. Car les astringens qui sont de grosse substāce,pour cause de leur astriction serrent & condensent la superficie du corps auquel ilz sont applicuez, & cela empesche qu'ilz ne puissent bien penetrer dedans. Et pour ne pouoir bien penetrer

dedans, ilz ne peuuent aussi bien ayder aux parties enflammées à cause que les parties sont serrées & cōdensées. Cela mesme dict Galen 3. *simplicium. cap. 6.* Puys doncq qu'il conste que le ius d'escorce de noix est de tenue substance, & neantmoins aspre, & astringent, Pourquoy le vinaigre, qui mesmement est froid, au second degré; & sec au tiers degré encore qu'il soit de tenue substance, ne pourra il auoir astriction?

PARADOXOLOS.

C'est vng argument par le semblable, de tous, le plus infirme & qui cloche d'ung pied.

PASQVIL.

Il ne cloche en rien. Car en tout, & par tout il est de mesme raison & ferme assez. Mais pour plus encore le rēforce le mesme noble auteur Galē 2. lib. *De compositione medicamentorum secundum locos.* dict le vinaigre auoir la faculté repulsoire, aussi attenuatiue, & discussiue, de la maniere mesme q̄ exactemēt tient l'air de bise. Or l'air de bise serre, & cōdēse les corps qu'il rēcōtre. Parquoy la mesme faculte tiēt le vinaigre, & par cōsequent est astringēt. Encore te vueil ie faire vn autre argumēt par les cōtraires.

PARADOXOLOS.

Or sus doncq?

PASQVIL.

L'operation du medicament froid est cōtraire à l'operation du medicament chault. Le medicament chault attire ou il est applique, & quant & quant relaxe. Parquoy au contraire le medicament froid resserre, & astringēt les parties, ou il est applique. Or est le vinaigre froid en sa souueraine qualité. Parquoy il est astrictif. Pour laquelle cause aussi Aristote appelle le froid en grec *συναγώνος*, qu'est à dire condensant, ou retirant: contraignāt ou serrāt.

PARADOXO L E R O S.

Cela ne fait rien contre moy car ores que le vinaigre soit froid, neantmoins par cela n'est il astringent. Car pour autāt qu'il penetre par sa tenuité la partie ou il est appliqué il ouure les pores, & par ce ne les condense, ne resserre? car autrement seroient deux actes contraires en vng meisme subiect ce que est impossible.

P A S Q V I L.

Oy bien (comme i'ay deuant dict) *simul & semel*, Mais non pas successiuelement & à diuers regardz. Car cōme le vinaigre soit froid pour le plus, & chault pour le moins: Or le froid en action est plus pigre, & tardif, mais le chault plus actif & soubdain à agir: les chauldes & plus subtiles parties du vinaigre premieremēt penetrent, & donnent voye aux parties froides à penetrer, & estant penetrées à dedās resserer,

ferrer, cōme le tesmoigne Galé de *simp. lib. 4. cap. 12.*
Ainsi le vinaigre après sa penetration ne laisse de
restraindre, & serrer les pores, à cause de sa froidu-
re, & siccité domināte. Car Galen dict. 2. *lib. simpl.*
cap. 24, la ppriété des choses froides est de cōdēser,
& resserrer: Et des choses chauldes de dilater & fai-
re fondre ou colliquer. Et à ce lieu cōforme Galé
sur Hippocras. de *morbis vulgaribus.* en parlāt de la
frigidité dict ainsi. La frigidité de sa nature serre,
cōdēse, ferme & restrainēt toutes les choses qu'elle
touche. Et pource icelle frigidité estoupe, & clost
les pores inuisibles, voire aussi les apparens.

PARADOXOLOS.

Je argumēte au cōtraire par le sens ainsi, Le vinaigre
incide, discute, & ouure les opiliōs, & d'aduāta-
ge il est aigre, non amer, acerbe, ny austere. Il n'ha
doncq' aulcune astrictiō,

PASQVIL.

La consequēce est faulce. Car Galen dict au 3. liure
Simplicium. cap. 7. Es medicamēs, tu trouueras que
ilz hont diuerse qualité ou vertu, & non seullemēt
diuerse, mais aussi cōtraire. Regarde ce q̄ Galé dict
de la Rose, laq̄lle est astringēte, & aussi est douce,
& amere, & si ha q̄lq̄ mordication. Mais pour cela
n'entēds pas, quād Galé dict q̄ la Rose ha astrictiō
meslée avec les aultres saueurs, q̄ pourtāt la dictē ro-
se ayt souueraīne astrictiō. Car si elle auoit astrictiō
extreme: les autres saueurs ne se pourroīēt cōpatir
ensemble. Mais pource q̄lle ha q̄lq̄ astrictiō, cela

ne repugne qu'elle ne ayt la mixtion des aultres faueurs, & qualitez, ainsi cōme Galē le dict 3. *simplcium*. Et non seulement en la rose tu trouueras cōtraires qualitez mais aussi à la Reubarbe, Aloe, & plusieurs aultres simples: desquelz les exemples bailler ie me deporteray pour le present, pour cause de briefueté. Mais cela est selō le moins ou plus, & ainsi ha le vinaigre aigreur incisiō, & astrictiō, l'une plus, l'autre moins. Et ainsi combien qu'il incide, penetre, extenue, & ouure les obstructiōs: pourtāt ne laisse d'auoir astriction, iasoit q̄ nō extreme. Car si elle estoit souueraine, ne pourroit incider, ny extenuer, ny ouurir les oppilations, ny auoir aigreur.

PARADOXOLEROS.

Tu me Rues tāt de coups, & te couures si finemēt, que ie ne say plus quasi de quel baston me ayder.

PASQVIL.

Ie te vueil doncq armer à l'encontre de moy, mais ce sera à la legiere. Galen semble faire pour toy 1. *Simpl. cap. 5.* ou en louant Platon de n'auoir cōfondu les faueurs, cōme ceulx qui disoient le poiure estre des medicamēs astringēs, comme il soit des acres: & le vinaigre de la nature des medicamens aigres: parquoy estant des aigres il n'est des astringens.

PARADOXOLEROS.

C'est cela, cest biē dict. *Santo de Dio*, Ie l'auois oblié,

PASQVIL.

Non pas oblié, car tu ne le sceuz iamais. Toutefois à ceste autorité ie respōdz par la mesme distinction que dessus, que au vinaigre pour le plus fort domine l'aigreur, pour le moins & plus foible, y est l'astriktion. Et vinaigre est il appelé pour la faueur en luy dominante sur toutes. Laquelle Neantmoins ne forclut point l'austerité, ou acerbité.

PARADOXOLEROS.

Vbide hoc?

PASQVIL.

L'experience le monstre. Car le vinaigre mis en la bouche rend la lāgue aspre, retraicte, & seiche. Or toutes choses qui cela fōt, sont estimées de faueur austere, Parquoy le vinaigre ha austerité, & par cōsequent astriktion,

PARADOXOLEROS.

Oy par aduenture à ton goust, & nō pas au mien. Et cela me semble impossible. Car le vinaigre de tenue substance, cōme pourroit il auoir austerité, qui est fondée en grosse substance, & l'aigre en la tenue?

PASQVIL.

Ie distictz icelle faueurs ou simples, ou cōposées? Quant aux simples, ie concede ce que tu dis: quāt aux cōposées, non. Car quand icelles faueurs sont composées, & mixtes, la faueur austere peut estre en chose tenue, pource qu'elle ne laisse pour sa tenuité, d'auoir quelques parties terrestres, & seiches. Or dict Galen *1. Simpl. cap. 19.* Au vinaigre cōme

aulx aultres liqueurs ,il y ha vne partie qui corre-
spôd aux feces,ou lyes,& celle partie est terrestre.

PARADOXEROS.

Oy mais, si tu prens du vinaigre quand il ha long
temps demouré en repos,& tu le mettes en autre
vaïseau,il n'aura point de parties terrestres.

PASQVIL.

Cela est parlé en cuyfinier,nô en medecin.Ie m'en
raporte mesme aulx alchemistes,& à lehã dru pa-
sticier;car côme le vinaigre soit corps mixte,& nô
simple,il ne peut estre si pur,qu'il soit du tout pur-
gé de lie,& partie terrestre: oultre ce ie vueil vser
d'une similitude prise sur la nature,pour te dônner
à entēdre q̃ le vinaigre oultre laigreur ha austerité.
Regarde q̃ tous les fruycts auāt q̃ d'estre meurs sōt
premieremēt acerbés,& puy s'austeres,& par acqui-
sitiō d'humidité deuiennēt puis apres aigres,exce-
ptées les oliues,lesquelles deuiēnent doulces,& nô
pas aigres.Or es fruycts icelle saueur aigre ha telle
affinité avec l'acerbe,& austere: q̃ tu ne trouueras
aucun fruyct lequel soit aigre,qui n'aye quelque
austerité.Sēblablemēt au vinaigre ayant aigreur,
cōbien qu'il soit engēdré par putrefaction,il y ha
q̃lque austerité.Pource disoit Galen 4. *Simpl.cap.*
12. & *Actius.* en son premier liure, le vinaigre, ou
plustost le vin degenerant en vinaigre se conuertit
en celuy humeur duquel le vin est produict. Or
de l'agreste,viēt le vin,L'agreste ha austerité,dōcq

aussi ha le vinaigre encore q̄ nō tā vehemēte cōme
l'agreste, L'agreste est froid, si est le vinaigre, cōbiē
q̄ de pl^o vehemēte froideur. Et cōbiē qu'il soit sou
uerainement froid, si ha il neantmoins q̄lq̄ chaleur
à raison de la putrefaction, & semblablemēt acri
monie: l'agreste ne ha ne chaleur ny acrimonie.
Aussi le vinaigre ha plus de tenues parties, que
l'agreste.

PARADOXOLEROS.

Or pour ma dernière main, ie Replicque encore
repellissant le vinagre estre repercussif: & pource
ne pouoir estre astringif.

PASQUIL.

Je te dy (cōme i'ay faict par auāt) q̄ astrictiō n'est
pas cōtraire à repercussion. Car vng mesme simple
biē souuēt peut estre repercussif, & aussi astringēt,
cōme les galles, le sumach, le vinaigre, & plusieurs
autres. Et icelluy simple lequel est repercussif &
astringēt ensemble, repercute beaucoup mieulx.
Aussi pourra estre vng medicamēt repercussif leq̄l
ne sera pas astringēt pour cela, cōme l'eau cōmu
ne. Sēblablemēt pourra estre vng astringēt, lequel
pourtāt ne sera repercussif, cōme est l'alū. Les froi
des, & chaudes medicines peuuent estre astringen
tes, mais les medicines repercussiues, fault nécessai
remēt qu'elles soient froides. Ainsi q̄ les medeci
nes acerbes, & austeres, sont toutes froides quant à
leur nature. Mais pourtāt, tous les astringēs, n'hōt

besoïg d'estre froidz. L'operatiō de la medicine re
percussive repulsive cōsiste en cecy. Applicquée
en q̄lconq̄ partie, refroidit le mēbre, & le rēd plus
densé, & serre les pores du dict mēbre, & en oste la
chaleur & rēd pl^e espes & gros, l'humeur q̄ en doit
decourir & si empesche q̄ l'humeur ne decoure au
mēbre. Et ceste operation principalemēt est faicte
par la medicine repercussive. Mais la medecine
astringēte, soit chaulde ou froide, garde de courir
& couler les superfluitez, pource quelle corrobore
accidētalemēt la vertu du mēbre, auq̄l elle est ap
plicquée: or la vertu corroborée expellit les choses
nuysantes, es moins nobles parties, & plus foibles
lieux. Dond ceste operatiō principalemēt, & pre
mierement se faict de nature: & en second lieu par
la medicine en sorte: que la repulsion se reduict
à la disposition du mēbre, & l'astriction se reduict
à la vertu corroborée. Et pource il est dict q̄ la me
dicine astringēte garde q̄ le membre ne recoiue les
superfluitez *gratia trāsmisionis*, & la medicine reper
cussive *gratia repulsus*. Tellemēt q̄ vng mesme me
dicament peut corroborer la vertu, & aussi faire
operatiō repercussive. Parquoy ta derniere main
est perdue, & derniere replicq̄ rabbatue, & ne scau
rois ne deburois plus que dire. Sinon (Cōme feit
Stestichorus.) chanter palinodie, pour amēde hon
orable, en cōfessant, & recognoissant q̄ Messieurs,
Martin Acakia, Tagault, Houlier, *Vidode vidis*, &
Fuchsius. suyuās doctemet la doctrine Galenicque;

hont tresbien dict en attribuāt aſtriction au vinaigre:laquelle doctrine *Iacobus Syluius* ha enfuyue, & n'en dict iamais le contraire,cōme tu donnes à entēdre,par l'autoritē de luy voulāt feire trouuer ta cause bonne.

PARADOXOLEROS.

Vrayemēt ie cognois bien q̄ tu es venu à me assaillir tout preparé,& premedité,& me has biē prins sans verd,tellemēt q̄ ie me sens aussi biē picqué & arrosé de ton vinaigre espaingnol:cōme es satyres de Horace le Grec *Persius* se sentit parfumé du vinaigre Italiē du Roy banny *Rupilius*.Mais vne autrefois quād ie seray bien armé ie auray ma reuēche.Adieu.

PASQVIL.

Atten,attē, encore vng peu.Ce n'est pas tout:Ce q̄ nous auons dict,n'ha esté q̄ disputatiō doctrinale du vinaigre.Mais maītenāt ie te vueil parler de toy mesme,& de tes defaulx & vices.Car puyſ q̄ en tō paradoxe tu ne has espargné aulcū:ains les has touchéz tous d'iniures,voire atroces,en disāt les medecins de Paris descognoissās,& mauuais praticiēs, vn medecin allemāt Louuenceau,ſentāt sa plume folle, vng aultre allemāt aussi inaduertēt,& mauuais traducter,les medecis de lyon estre dissimulateurs,cacheurs de verité,& craīctifz.En particulier appellāt vng medecin lyonnois endormy faulx interpreteur,imposteur,& mēteur,& par ironie allegueur incroyable de memoire diuine, vng aultre

obstiné, & ignorât, vng aultre lâgagier, vng aultre,
hôme cōuoiteux, vng chirurgiẽ aueugle mene par
vng aueugle. Et (q̃ pis est) en vne epistre au lecteur
quãd tu ferz imprimer vng liure intitule. *De agri-
tudinibus infantium Pauli Bagelard*. En laq̃lle epistre cō-
tra iusiurandum hippocratis leq̃l nous cōmande re-
uerer, nos precepteurs cōme nos peres. Tu appelles
ceulx q̃ iadis hont esté tes maistres à. Montpellier,
gēs de grand sauoir & renó maintenāt trespassez.
tu les appelles *Deliros Senes* Vieulx resueurs. Puy
q̃ tu y has ainsi procedé par iniure, la raison veult
le taliõ & que tu sois vesperisé sur tes mœurs: Or
escoute doncq tes veritez: & là legende dorée de
tes beaux faictz.

PARADOXOLEROS.

Santo de Dio. Ie n'ay pas maïtenāt le loisir. P'ay vne
assignation ou il me fault à ceste heure necessaire-
ment trouuer. Pource ie men vay, Adieu.

PASQVIL.

Demeure, demeure, arreste, encore vng mot

PARADOXOLEROS.

Santo de Dio Tu ne me tiendras plus. Adieu.

PASQVIL.

Il sen va, il m'est eschappé, il sen est vollé cōme la
mouche guespe, ayant laissé l'aguillon en la playe
qu'il ha faicte. Mais, Si ie le puis encore tenir vne
fois: il entendra, que ce que ha esté dict n'est que
ieu au pris de ce que nous dirons.

F I N.

Deus in mās gitorum
Meruū iustā de
Domine ad adjuuandū
mō sūstina tēzā a pātri
Et filio Et Spiritus